

南山谷口考

關中叢書

南山谷口考

邵力子署

序

秦據天下上游之勢控河山百二之雄一旦盜至叩關入絕無留者而往來自如也尙爲秦有人乎夫關中被山帶河險阻之四塞未改也固猶然天府之國也伊古在昔王者得之以王霸者資之以霸矣中才處之宜猶足以自保哥舒翰輩不足論何以同治之元賊薄武關旣莫之爲禦以成秦禍越五年而寇我潼關猶莫之懲而坐失連城之險耶韓退之守戒曰在得人豈不信哉人之一身腠理爲急護其要害數處而止耳秦爲天下之脊南山則秦之脊也而山之諸谷則其竅繁也顧其說往往散見於篇未有

匯而著之者倉卒有事將回惑而不得其要誠讀是書而講其利害聚餉選兵以扼之外侮絕焉舉良有司而填撫其民內亂奚生焉毛子作爲是書其猶足雪秦無人之譏乎易曰王公設險以守其國苟得其人雖無險隘乎猶將陂塘灤以限戎馬列保寨以固藩籬矧擁河山之勝哉雖然彼泄泄者昧安不忘危之義方且迂是書以覆瓿而莫之省也毛子其柰之何也毛子曰士君子得位則行其道窮則立言以儲用有鞏屏藩以衛國家者乎是書也吾將存之以俟其人同治七年歲在著雍執徐秋壯月旣望紹興山陰萬方煦序於長安旅舍之豫齋

陝西南山谷口考

谷山口也說文云泉出通川爲谷今音讀若穀古音讀若欲又轉爲裕又轉爲

庾又轉爲油今關中讀若裕而其字則俗書加山作峪今兩存之所謂名從主人也

揚州甘泉毛鳳枝撰

關中之險東有潼關西有隴阪東南有武關北有大河所謂四塞之國也而其足爲關中之患者則恆在南山誠以南山脈起昆侖尾銜嵩嶽橫亘潼關華陰華州商州維南渭南藍田咸寧長安鄠縣盩厔郿縣寶雞之境幾及千里深山穹谷不可殫究其正南通興安出鄖襄其東南抵商州連楚豫其西南毗漢中道隴蜀昔年賊蹤出沒無不假道于此故關中之患恆在南山而南山之患又在諸谷也

議者謂三秦地利自古稱雄多事之秋足以自守不知古人尙車戰故山谿足以隘戎馬今則步騎風馳詭道萬端攻其無備出其不意有出于鄧艾陰平之上者而南山諸谷徑路紛歧多置兵則備多力分少置兵則顧此失彼故今日之關中不若大梁之易守也大梁雖四戰之地然我無險賊亦無險關中則不然我之險要善守之足以制寇不善守之使賊乘閒而入則南山之險反爲賊用彼利則進攻不利則退守是猶納蜂蠆于袖中閉虎狼于一室其不嚙且蠶者鮮矣吾故曰守大梁易守關中難雖然地無常勢兵無常形善用兵者因地形以知利因地利以設謀

雖丈五之溝漸車之水尙能禦寇况乎百二之雄哉故攷
南山谷口北向者起潼關抵寶雞凡得一百五十所箸于
篇

自潼關以西渭水之南山之大者皆曰南山南山之高者
悉名秦嶺潼關之南又有小秦嶺接商州境其谷則一曰
大谷俗名太峪口亦曰秦峪嶺

在潼關城南四十里有太峪關舊志云屬河南閩鄉三
省邊防道路攷由雒南縣北三十里曰石家坡又三十
里石牆又二十五里巡檢司又三十五里黑掌坡又十

五里太峪嶺

通志云潼關城西南至雒南縣治一百四十五里

至潼關界山路

陡險由谷口沿山東行可達闕鄉亦閒道也

又西爲麻谷

在潼關城南四十里有麻峪關

又西爲禁谷

一名禁溝一名禁院

禁谷之北曰蒿岔峪

蒿亦作蒿

禁谷在潼關城南三十里有禁峪關通志云潼之左有谷平日禁人往來以權征稅谷之南爲雒南界唐廣明初黃巢陷虢州張承範屯潼關關左有禁谷官軍忘守卽此今案谷之北有龍王廟又北曰蒿岔谷有蒿岔谷水北入河沿谷水北行登潼關南原復折而西可越過潼關達華陰境

案通志輿圖華陰縣東南二十八里有瑞村原距潼關十里瑞村原之北又有

金盆原此二原當與潼關之南原相接俟攷○案明史崇禎八年九月洪承疇破流寇于渭南臨潼關李自成東走高迎祥亦屢敗東踰華陰南原絕嶺偕自成出朱陽關與張獻忠合是南原自昔爲閒道矣○又崇禎十一年李自成東遁洪承疇令曹變蛟設伏于潼關之南原大破之賊旣以南原爲閒道果能設伏于此豈非伐謀之昔人嘗設十二連城于此置兵戍守以防秦嶺諸

谷今連城旣廢禁谷幾成坦途矣○通志云潼關古關

隘舊有十六一曰古城關在城東南四里自此至西谷

皆有烽臺一曰寺角營關在城東南十五里一曰車峪

關在城東南三十里一曰西峪關在城東南四十里一

曰石門關在城南二里一曰禁峪關

北魏宇文泰擊竇泰至小關卽此

在城南十里一曰巡底關在城南十里一曰溝西關在

城南十五里一曰漢井關在城南二十里一曰五莊關

在城南二十五里一曰麻峪關在城南三十里一曰水

門關

疑卽下之水谷

在城南三十里一曰太峪關在城南三十

里

太谷見前

一曰潼峪關在城南三十里潼峪舊有防兵一

曰上關在城南三十里一曰南渡關在城西十里一曰

永樂關在城東北四十里有永樂鎮渡以上十六關基

址俱存而防守城堡墩臺久廢

余案南渡永樂二關爲西北之隘其餘皆南山

閒道也又城東有姚讚屯南有暗門隘姚鸞屯俱廢

潼關連城說

楊端本撰文載陝西通志

昔人謂泥丸東封函谷關今日之潼關鎖鑰西秦謂卽

古之函谷者非也然入關有三道潼入關之正道也商之武關入關之孔道也昔漢祖破秦由此入咸陽朝邑古臨晉地自夏陽至關平曠百里大河易渡漢祖往來關中常由臨晉而七國之變亦欲兵由此入是又入關之隙道也五泉先生云一方不戒三險俱失誠哉是言也然武關萬山險阻一將偏師可以無虞朝邑雖曰平曠百里命將建營于中路設巨礮數十南北巡守則大河卽天塹也至潼關之守則禁阮最爲要地昔黃巢從禁阮破關明逆闖李自成亦由禁阮陷關豈非一方不戒而失三險之明驗乎蓋疎忽地理之要而十二連城

之廢也古設十二連城于禁溝之西由南郊以抵山麓計三十里而十二城是三里一城也每城設兵百人而于中城益其兵多設火器矢弩連絡呼應疾若風雨卽有百萬之眾豈能超越而飛渡耶故守關而不守禁溝者守猶勿守也守禁溝而不建十二連城者守猶未善也是猶一室之內杜門塞竇以防鳥雀之入而忘閉其牖也是以關予敵非所以固圉也守關者察地理之形勢謀封疆之萬全周歷山川曠覽古昔鑒觀成敗其于建連城以控禁溝控禁溝以固關亦訐謀而重慮之乎附載通志云潼關南門外不數武卽閿鄉華陰界今案

輿圖由潼關東南三十里之董社原

隋楊元感與宇文述戰于此

西

行過蒿岔峪河又渡潼河西行可越過潼關至華陰又

由潼關東南之金陡關西行至閻王溝

一名源望溝

傍南原

西行渡蒿岔河又渡潼河楊家河亦可越過潼關至華

陰疑皆閒道也

此就圖言之尚宜詳攷

或云潼關北城門外黃河

水涸時由河灘行走亦有閒道至華陰

又西爲水谷

又在潼關城南三十里有水門關自水谷以西南山之高

者皆名秦嶺

通志云秦嶺在潼關城南三十里嶺南卽雒南界相近有龍文山

又西爲潼谷水經注謂之通谷

在潼關城南三十里潼水出谷中北入河有潼谷關峪口有老君洞

又西爲蒲谷

在潼關城南三十五里爲潼關華陰連界處

右潼關谷口凡九關城南距秦嶺三十里

又西爲松果山

在華陰縣東南二十七里通志云山通襄鄧之間

又西爲水谷

在華陰縣東南有泥泉水北入渭谷南爲秦嶺

又西爲靈谷

在華陰縣東南

又西爲朝陽山一名留翎巘

在華陰縣東南山南爲秦嶺通志云秦嶺在華陰縣南

屬華雒分壤之界

華陰南至雒南縣界四十里至雒南縣治一百七十里西南至雒南縣界

里八十西接華州東抵潼關懸崖疊嶂高不可攀通行者

皆曲徑實終南一脈

又西爲蒲谷

在華陰縣東南有蒲谷水北入渭

又西爲寶谷一名杜谷

在華陰縣東南有寶谷水北入渭

又西爲黃神谷

在華陰縣東南有黃龍潭水北入渭

又西爲泰華山

在華陰縣城南十里

又西爲仙谷

在華陰縣西南有車箱谷水北入渭

車箱谷在仙谷之南

又西爲好漢山

在華陰縣西南十五里

又西爲甕谷

在華陰縣西南十五里有黃酸水北入渭土人云甕谷

有路通藍田通志云甕谷環抱如甕爲商雒徑道道險
舊有防兵谷之南有升山爲黃酸水發源處縣志云甕
谷爲商雒徑道道甚險惡明知縣王時雍修治之入谷
五十里曰甕嶺東轉爲華陽川卽古陽華敷也通志驛
傳攷由雒南縣北二十五里曰齊家鋪又三十里楊氏
城鋪又二十里板廟河鋪又二十里度黃龍山至華陰
縣甕岔鋪卽甕谷路矣

又黃龍山之東有香山及太子坪距雒南百里亦與華陰連界

又西爲大敷谷一名羅敷谷

在華陰縣西南三十里有敷谷水受秦嶺諸小水經流
最大北入渭通志云入谷十三里有相公嶺